

■ COLUMNA

Emprovas da scriver ina columna

DA MARIA CADRUVI

En mes computer datti sut «Quotidiana» in ordinatur cun il titel «emprovas». Qua hai jau arcunà in tozzel sbozs. Texts ch'jau hai cumenzà a scriver ina giada perquai ch'jau hai già in'idea. Ma cun scriver è l'impressiun vegnida che l'idea na saja tuttina betg uschè buna e na tegnia betg per ina columna. Per finir hai jau lura mingamai prendi in auter tema.

Ina giada p. ex. vulev'jau scriver insatge sur da garantias. Jau vuleva accentuar ch'i na dettia betg garantias per tut en la vita. Ma jau vulev'era criticar il fatg ch'ils apparats ch'ins cumpra ozendi tegnian exact dus dis sur la data da scadenza da la garanzia – e lura èn els futsch. Lur durada da vita vegnia para scursanida voluntariamain, avev'jau udì. I dat perfin in pled per questa chausa: obsolescenza planisada. Quai vul dir ch'ils apparats èn defects pli spert che quai ch'i fiss tecnicamain necessari. Economicamain po quai esser interessant, ecologicamain èsi... tar il pled portgaria hai jau chalà da scriver vinavant questa columna.

Ina giada hai jau cumenzà a scriver sur dal iper-



ventilar. En mes sboz hai jau ludà il pli emprim noss sistem da respirar che funcziuna senza che nus carstgauns al stoppian diriger sapientivamain. I va tut da sasez da laschar vegnir l'aria e da laschar ir l'aria. Nossa respiraziun s'adattescha a la situaziun. Sche nus durmin ha ella in auter ritmus che sche nus currin da stgala si. Mintgatant èsi prudent da daventar conscient da quai. Jau aveva lura filà vinavant ch'i dettia glied che iperventileschia – betg per tema da mancanza dad aria, mabain per mancanza dad arguments. La tema è era tar quella glied ina cumpogna fidavla. Far tema als auters è là la devisa! Cun turnar en mes text tar la iperventilaziun en il vair senn dal pled hai jau capitulà... ord respect e perquai ch'jau n'enconusch (per fortuna!) betg ord atgna experientscha las anguschas d'ina persona

ch'ha propri difficultads cun la respiraziun.

In'otra giada hai jau già la ferma intenziun da tematisar en ina columna il motto: Noss amis ston era esser voss amis, e noss inimis ston sa chapescha era esser voss inimis. Questas loialitads sfurzadas san chaschunar blers malessers en famiglias, vitgs, partidas, gruppaziuns e stadis. Jau aveva perfin legì «Crappa-grossa» da Fontana per mussar che nus Rummantschs avain era noss Romeos e nossas Giuliettas cun lur famiglias davostiers. Jau hai lura vulì preschentar differentas vias per interromper las spiras disgraziadas cun l'etichetta «noss inimis ston era esser voss inimis». Ina pussaivladad fiss stada: prender sez posiziun ed avair il curaschi, las ideas e la perseveranza da far e patrar auter. In'otra è da pi adina gia stada: l'amur. Ma quai cun l'amur ma pareva, formulà uschè simpel, in pau... Ed jau hai laschè esser sboz era quest sboz.

In di hai jau vulì metter en il chanaster da palpì tut quests sbozs. Sco quai che Vus avais gist savì constatar hai jau la fin finala tuttina salvà els. Ins na sa mai.

maria.cadruvi@spin.ch